

Aalisarneq pillugu Inatsisartut inatsisaata nr. 18-ip, 31 oktober 1996-imeersup allanngortinnissaanut Inatsisartut inatsisissaattut nr. xx xx 2011-imeersutut siunnersuut (Piginnittuunermut tunngasut kiisalu pisassiissutit qaffasinnerpaaffissaannik killiliinerup allanngortinnissaat)

Saqqummiussivoq Naalakkersuisunut ilaasortaq Ane Hansen, Inuit Ataqatigiit

pillugu

Aalisarnermut, Piniarnermut Nunalerinermullu ataatsimiititaliap isumaliutissiissutaa.

Siunnersuutip aappassaaneerneqarnerani saqqummiunneqartoq.

Aalisarnermut, Piniarnermut Nunalerinermullu ataatsimiititaliap suliarinninnerani ilaasortat uku ilaapput:

Inatsisartunut ilaasortaq Aqqaluaq B. Egede, Inuit Ataqatigiit, Siulittaasoq
Inatsisartunut ilaasortaq Niels Thomsen, Demokraatit, Siulittaasup tullia
Inatsisartunut ilaasortaq Juliane Henningsen, Inuit Ataqatigiit
Inatsisartunut ilaasortaq Hans Aronsen, Inuit Ataqatigiit
Inatsisartunut ilaasortaq Karl Lyberth, Siumut
Inatsisartunut ilaasortaq Hans Enoksen, Siumut
Inatsisartunut ilaasortaq Finn Karlsen, Siumut

UPA 2011-mi ulloq 13. april siullermeerereernerup kingorna siunnersuut Ataatsimiititaliap misissorpaa.

Siunnersuutip imaa aamma siunertaa

Inatsisissatut siunnersuummi siunertaavoq aalisarnermik inuussutissarsiornermi ineriartornerup kingunerisaanik killiuliussatut atugassaritinneqartut aqqiivigineqarnissaat.

Siunnersuutip kinguneraa Aalisarneq pillugu inatsimmi § 6, imm. 3 nr. 4-p, § 6, imm. 4 nr. 3-p aamma § 6, imm. 5 nr. 2-p aamma 3-p atorunnaarsinneqarnerat, taamaasillunilu aalisariutininik piginnittunut Kalaallit Nunaanni inuussutissarsiuutigalugu aalisarusuttunut ukiuni kingullerni marlunni aalisarnermik ingerlataqarsimanissaat aamma isertitat tamarmiusut

4. november 2011

UKA 2011/35
(FM 2011/88)

ikinnerpaamik affaasa inuussutissarsiutigalugu aalisarnermit sulianilluunniit tassunga tunngasuteqartumit isertitaasimanissaat piunasaqaataajunnaassalluni.

Siunnersuutittaaq kingunerissavaa Aalisarnej pillugu inatsimmi § 15, imm. 4-p allanngortinneqarnissaa, taamaalilluni sinerissap qanittuani aalisarnermi pisassiissutit qummut killingi 10 %-iniit 15 %-imut qaffanneqassallutik.

Siunnersuutini Naalakkersuisut makku pingaarnertut anguniarpaat:

- Sapinngisamik pisortanit tapiissuteqarfiunngitsumik aalisariutinik sinerissamut qanittumi aalisartuusunik nutarterinikkut aalisartut ataasiakkaat isertitaqarnerulernissaat.
- Aalisarnermik ingerlatsineri isertitaqarnerulernissaq taamatullu pisuussutinik atuineri erniat annertunerulernissaat.

Allannguutit marluusut aallaavigalugit aalisarnerup aningaasalersorneqarnerata aalisariutillu nutarterneqarnissaat siamasissumik periarfissaqarnissaa Naalakkersuisut anguniarpaat, ullumikkummi aalisariutit pisoqalisut aserfallatsaaliuinnermut qaffasissumik aningaasartuuteqarnej killilimmillu ingerlatsisinnaaneq annertuumik ilisisarnaatigimmassuk. Isumalluutit atorluarnerunerisigut aalisarnerup pitsaanerusumik unammillersinnaasup aalisartunut inuiaqatigiinnullu iluaqutaanerusup pilersinneqarnissaa taamaalilluni periarfissiuunneqassaaq, taamaalillunilu naggataagut aalisarnermik inuussutissarsiut aningaasarsiornikkut imminut napatittoq ataavartumillu imminut pisariaqartutigut naleqqussarsinnaasoq pilersinneqassalluni.

Allannguutit siunnersuutigineqartut Aalisarnej pillugu Ataatsimiititaliarsuup isumaliutersutaanut februar 2009-meersumut aamma 2011-imi upernaakkut Grønlands Revisionskontor A/S-ip suliaanut "Raajat pillugu Paasiniaaqqissaarnej"-mut naapertuupput, tassani inerniuliunneqarami: *"aalisarnej imminut akilersinnaasoq angusaqarfulluurtumik ingerlakkaanni, aalisarnej imminut akilersinnaasoq angusaqarfisigissallugu periarfissaqarpoq."* Paasiniaaqqissaarnermi tassani aamma aaqqissuussaanermi naleqqussaaneq pisariaqartutut taaneqarpoq.

Naalakkersuisunit siunertaavoq § 6-ip allanngortinneratigut aalisartut akornanniinngitsunit, tassa avataneersunit" aalisarnermi aningaasaliinissamut periarfissaq ammaanneqassammat, aalisarnermik inuussutissarsiutillit aalisariutinik aningaasaliinissamut aningaasanik amerlasuunik pisariaqartunik amigaateqarnerat pissutigalugu. Taamaalilluni inatsisip allanngorneratigut allat aalisartut akornanniinngitsut assersuutigalugu inuit ataasiakkaat imaluunniit kalaallit suliffeqarfii imaluunniit ingerlatseqatigiiffii allat aalisarnermik inuussutissarsiuteqarnermut aningaasaliisinaanerat periarfissaalissaaq.

4. november 2011

UKA 2011/35
(FM 2011/88)

Maanna § 6-ip ilusilerneqarneratigut malunnarsimavortaaq sinerissap qanittuani aalisarnerup aaqqissuussaanerata naleqqussarneranut tamanna akornutaasoq. Assersuutigalugu kinguaariit nikinnerannut atatillugu aalisarnermik inuussutissarsiuqartut aalisarnermik ingerlatsiunnaarsinnaanerata aalajangersakkakut ajornakusoortinneqarsimavoq, ilaatigullu allatigut isertitaqarnissamut periarfissarsionnissamut inuussutissarsiuqartut aalisartut iliuuseqartannginnerannut pissutaaqataasimavoq, aalisarnermummi akuersissutip annaanissaa mianerisariaqarmat.

Inatsisip allanngorneratigut aningaasat nunanit allaneersut atorlugit Kalaallit Nunaanni aalisarnermut pisinissap periarfissaanera ammaanneqanngilaq, taamaalilluni Kalaallit Nunaanni isumalluutit allanit pissarsiarineqarsinnaanatik.

Aamma siunnersuutip akuerineratigut allaffissornikkut oqilisaaneq anguneqassaaq, akuersissummik qinnuteqartup ukiuni siuliini marlunni isertitaqartarnermik atugai pisortanit misissorneqartarunnaassammata.

Naalakkersuisunit siunertarineqarpoq § 15-ip allanngortinneratigut ingerlatat annertunerusut pilersinnissaannut aalisartut akunnerminni suleqatigiilersinnaanerata, taamaaliornikkullu annertuumik ingerlatsinerup iluaqutissartai pillugit nalinginnaasumik isumaqarneq pissutigalugu aalisariutit nutarterneqarnissaannut pitsaanerusumillu ingerlatsisinnaanissaannut aningaasalersuineq periarfissaalluarnerussammat.

Allannguutissatut siunnersuutip immikkoortua una aamma Aalisarnerq pillugu Ataatsimiititaliarisuuq isumaliutersuutaanut naapertuuppoq.

Inatsisartut inatsisaat ulloq 1. januar 2012 atuutilissasoq siunnersuutigineqarpoq.

Siunnersuutip Inatsisartuni siullermeerneqarnera

Allannguutissatut siunnersuut ulloq 13. april 2011 siullermeerneqarpoq. Oqallinnermut atatillugu oqaatigineqartut Ataatsimiititaliap innersuussutigivai.

2010-mi aasakkut Aalisarnermut, Piniarnermut Nunalerinermullu Naalakkersuisoqarfiup tusarniaanera

Tusarniaanermit akissutit inatsisissatut siunnersuummut ilanngunneqarput.

Aalisarnerq pillugu inatsimmut nutaamut siunnersuut 2010-mi aasakkut susassaqartunut attuumassutilinnut qaammatini marlussunni Naalakkersuisoqarfimmit

4. november 2011

UKA 2011/35
(FM 2011/88)

tusarniaassutigineqarpoq. Tusarniaassummi nassiuqqartumi inatsisissatut siunnersuummi nassiuqqartumi Aalisarnej pillugu inatsisimmi maanna attuuttumi § 6 allannguuteqanngitsoq takuneqarsinnaavoq, taamaalillunilu maanna § 6-imut allannguutissatut siunnersuutigineqartumut isertitat tamarmiusut ikinnerpaamik affaasa inuussutissarsiutigalugu aalisarnermit isertitaasimanissaat piumasagaataajunnaassasoq pillugu isummernissamut tusarniarneqartut periarfissaqarsimanngillat.

Tusarniaanermi piffissarititap naanerani Aalisarnermut, Piniarnermut Nunalerinermullu Naalakkersuisoqarfimmit tusarniaanermi akissutit ukunanit tiguneqarsimapput:

Siulittaasup Naalakkersuisoqarfia, Inatsiseqarnermut Allaffik, Pinngortitaleriffik, Royal Greenland, Ineqarnermut, Attaveqarnermut Angallanermullu Naalakkersuisoqarfik, Inuussutissarsiornermut Suliffeqarnermullu Naalakkersuisoqarfik, Aningaasaqarnermut Naalakkersuisoqarfik, Peqqinnissamut Naalakkersuisoqarfik, EU (DG-MARE), Nunamut Namminermut, Pinngortitamut Avatangiisinullu Naalakkersuisoqarfik, Grønlands Kommando, KANUKOKA, KNAPK, NUSUKA, Grønlands Revisionskontor, Advokatfirmaet Kormann Reumert, Isumaginninnermut Naalakkersuisoqarfik, Kalaallit Nunaanni Sulisitsisut Peqatigiiffiat (ilaallutik ilaasortat sinnerlugit akissutit, AP, Revisionsfirmaet Deloitte aamma Grønlandsbanken).

2010-mi tusarniaanermi akissutit taaneqartutut aalisarnej pillugu inatsisissatut nutaamut tamarmiusumut siunnersuummut tungassuteqarput, tassanilu ilaanngilaq § 6-ip allanngortinnissaanut siunnersuut, akissutit taakku isumaliutissiissummi uani **ilanngussaq 1-tut** ilanngunneqarput.

Aalisarnermut, Piniarnermut Nunalerinermullu ataatsimiititaliap 2011-mi aasap naajartornerani tusarniaanera

Ulloq 18. marts 2011 ilaatigut Aalisarnermut, Piniarnermut Nunalerinermullu Naalakkersuisup Ane Hansenip aamma Aalisarnermut ataatsimiititaliap akornanni paasissutissiilluni ataatsimeeqatigiinnermi Naalakkersuisumit ilisimatitsissutigineqarpoq tusarniarnermi piffissarititaasup kingorna KNAPK-p aamma Sulisitsisut ataatsimeeqatigineqarsimasut. Paasissutissiilluni atatsimeeqatigiinnernit oqaasiinnartigut ingerlanneqartutigut imaqarnialiaqarnersoq takussutissaqanngilaq.

Ulloq 18. maj 2011 allakkatigut aamma ilaatigut Aalisarnermut, Piniarnermut Nunalerinermullu Naalakkersuisoq Ane Hansen Ataatsimiititaliamit aperineqarpoq § 6 pillugu allannguutissatut siunnersuutit pillugit tusarniaanerit qaqugu naammassineqassanersut naatsorsuutigineraa. Ulloq 15. juni 2011 allakkatigut akissuteqarnermini Ane Hansen

4. november 2011

UKA 2011/35

(FM 2011/88)

ilisimatitsivoq allannguutissatut siunnersuut pineqartoq pillugu tusarniaanissamik pilersaaruteqarani.

Aalisarnermut, Piniarnermut Nunalerinermullu ataatsimiititaliap ilisimalluarpaa tusarniaanerit ingerlanneqarnissaat pisussaaffiunngitsoq, kiisalu tusarniaanermut akissutit tiguneqartut inatsisissatut siunnersuutip suliarinerata ingerlaqqinnerani taamaallaat siunersiunerusartut. Pineqartumi oqallinneq pisoq tunuliaqutaralugu Aalisarneq pillugu inatsisip allanngortinnissaanut siunnersuutit kingulliit pillugit tusarniaasoqannginnera Ataatsimiititaliap ajuusaarnartutut pissusissamisunngitsutullu isigisimavaa, taamaattumillu allannguutissatut siunnersuummik suliarinninnerminut atatillugu namminerisaminik aalajangerpaa § 6, imm. 3-p allanngortinnissaanut immikkut siunertaqarluni tusarniaassutiginiarlugu. Tamatuma kingorna siunnersuut 30. august 2011 allakkatigut ukununnga tusarniaassutitut nassiunneqarpoq:

Royal Greenland, Polar Seafood, KANUKOKA, KNAPK, NUSUKA, Sulisitsisut aamma Grønlands Revisionskontor.

Aalisarnermut, Piniarnermut Nunalerinermullu ataatsimiititaliap tusarniaassutaa nassiunneqartoq aallaavigalugu tusarniaanermut akissutit isumaliutissiissumi uani ilanngussaq nr. 2-tut ilanngunnerput.

Isumasioqatigiinneq

Aalisarnermut, Piniarnermut Nunalerinermullu ataatsimiititaliaq siunnersuummik suliaqarnerminut atatillugu Aalisarnermut, Piniarnermut Nunalerinermullu Naalakkersuisumik Ane Hansenimik ulloq 12. april 2011 isumasioqateqarsimavoq.

Aamma ulloq 24. oktober 2011 paasissutissiilluni ataatsimiittoqarpoq, tassani Naalakkersuisunut ilaasortaq Aalisarneq pillugu inatsimmi allannguutissatut siunnersuutit pillugit ilisimatitsivoq.

Ulloq 1. november 2011 Ataatsimiititaliaq Aalisarnermut, Piniarnermut Nunalerinermullu Naalakkersuisumik Ane Hansenimik isumasioqateqarpoq, kiisalu Grønlandsbanken paasissutisseeqatigiilluni ataatsimeeqatigineqarluni, kiisalu Ataatsimiititaliaq Pinngortitaleriffimmik kingullermik ulloq 3. november 2011 paasissutissiilluni ataatsimeeqatigineqarpoq.

Siunnersuutip Ataatsimiititaliamit suliarineqarnera

4. november 2011

UKA 2011/35

(FM 2011/88)

Ataatsimiititaliaq isumaqatigiittoq isumaqarpoq aalisarnermi, immikkullu sinerissap qanittuani raajarniarnermi, pitsanngorsaanerit pisariaqartut aamma aaqqissuusseqqinerit pisariaqartut aningaasalersuinissaannut aamma ajornartorsiutaasunut ikiorsiinissamut tunngaviatigut aaqqissuussinikkut inatsisitigut iliuuseqarnissaq pisariaqartoq.

Tusarniaanermi akissutit tiguneqartut aamma inatsisissatut siunnersuutip siullermeerneqarnerani oqallinneq aallaavigalugu Ataatsimiititaliap maluginiarpaa siamasissumik isumaqataaffigineqartoq inuussutissarsiutigalugu aalisarnermi aalisariutinik piginnittut Kalaallit Nunaanni inuiaqatigiinnut aalajangersimasumik attuumassuteqassasut. Ataatsimiititaliaq isumaqarpoq Kalaallit Nunaanni inuiaqatigiinnut aalajangersimasumik taamatut attuumassuteqarneq najukkamut, piginnittuunermut aamma ingerlatseqatigiiffinni piginnittuunermut tunngasut pillugit piumasaqaatit inatsimmi kapitali 4-mi allassimasunit tamakkiisumik qulakkeerqartut.

Ataatsimiititaliaq isumaqatigiittoq isumaqarpoq aamma pingaaruteqartuusooq ingerlatseqatigiiffiit imaluunniit inuit ataasiakkaat pisassat ilaannik toqqaannartumik imaluunniit toqqaannangitsumik pisinermikkut inatsimmi pisassiissutit annerpaaffissaat qaangerlugit sinerissap qanittuani aalisariutini aqutsiffiusumi pisassat ilaannik pissarsisannginnissaat Naalakkersuisut isumannaassagaat.

Ataatsimiititaliami amerlanerussuteqartut Inuit Ataqtigiinnit aamma Demokratinit sinniisut naliliipput § 6-p allanngortinneratigut aalisariutini kinguaariit nikinnerisa pilertornerusumik ingerlanissaanut ilapittuutaasinnaasoq. Tamatuma saniatigut ilimanarpoq isertitatigut piumasaqaatit sakkukillinerisa allamik suliaqarnissamut tamakkiisumik ilaannakortumilluunniit maanna aalisartut ilaasa misiliinissaannut tamanna ilapittuutaasinnaasoq, kissaatigineqarpalli aalisarnermik pingaarnertut inuussutissarsiornermut uteriaqqittoqarsinnaavoq.

Ataatsimiititaliami amerlanerussuteqartut Inuit Ataqtigiinnit aamma Demokratinit sinniisut aamma naliliipput § 6-ip allanngortinnera kalaallini inuiaqatigiinni sinerissamut qanittumi aalisarnerup aningaasaqarnikkut pitsaaneruserusumik tunngaveqalernissaanut ilapittuutaassasoq, inuttaasut nunaqavissut suliffeqarfiillu amerlaneruserusut sinerissamut qanittumi aalisariutinut aningaasaliinissamut periarfissaqalerpata.

Ataatsimiititaliami amerlanerussuteqartut Inuit Ataqtigiinnit aamma Demokratinit sinniisut isumaqarput siunissami aalisarnerup sunniuteqarluartup, imminut akilersinnaasup sapinngisarlu malillugu imminut aningaasalersortup ingerlassinnaanissaanut, sinerissap qanittuani pisassat amerlanerpaaffissaasa 10 %-imiit 15 %-imut qaffannissaa pisariaqartoq.

4. november 2011

UKA 2011/35
(FM 2011/88)

Ataatsimiititaliami amerlanerussuteqartut Inuit Ataqatigiinnit aamma Demokraatinit sinniisut taamaattumik isumaqarput inatsisissatut siunnersuut saqqummiunneqartoq aalisarnermi aningaasarsiornermik ineriartornermut nutarterinermullu tunngavissaasoq piukkunnartoq.

Ataatsimiititaliami amerlanerussuteqartut Inuit Ataqatigiinnit aamma Demokraatinit sinniisut oqaaseqaatit ataaniittut saqqummiuppaat:

Aalisarneq pillugu inatsimmi § 6, imm. 3, nr. 4 pillugu

“Siullermik:

Aalisarnermi inuussutissarsiuteqartut, isertitatigut piumasqaatit sakkukillinerisa malitsigisagaa aalisarsinnaanermik maannakkut akuersissummik peqareersut ingerlaqqissasut.

Aappaattut:

Siunissami aalisarnermi tunngaviusumik ilinniarnikkut allagartallit kisimik isersinnaanisaaannut piumasqaateqartalernissamik Naalakkersuisut misissueqqullugit kissaatigineqarpoq.

Taamatullu,

Aalisarnerup iluani kinguaariit nikittarnerat aqqutigalugu, siunissami ilinniarnikkut allagartallit kisimik pisassanik aalisarsinnaanermullu akuersissummik pisinnaassasut matumani ilanngullugu misissorneqartariaqarpoq. Tamatuma kingunerissanngilaa, ullumikkut akuersissummik pisassanillu pigisaqartut allannguivigineqarnerinik.

Pingajuattut:

Inuit nunatsinneersut aalisarnermik ilinniarnikkut allagartaqanngitsut aningaasaliinermikkut piginneqataasinnaapput, pisassat aalisarnermillu akuersissutip avataatigut.

Aalisarnermi pillugu inatsimmi § 15 imm. 4 pillugu

Ataatsimiititaliami amerlanerussuteqartut isumaqarput § 15 imm. 4-p allanngortinneqarnissaanut sinerissap qanittuani raajarniarnermi pisassiissutit qummut killingisa 10 %-init 15 %-inngortinneqarnissaat pisariaqalersimasoq.

Sinerissap qanittuani raajarniarnermi aalisariutit, ullumikkumut amerlasuut pisoqalisimapput naleqqukkunnaarsimallutillu. Tamatuma kingunerivaa aningaasarsiorsinnaanerup ajornarsiartorsimanera.

Amerlanerussuteqartut isumaqarput inatsisitigut allannguinerup kingunerissagaa naleqqussaasinnaaneq, nutarsaasinnaaneq akilersinnaasunngorsaanerlu tunngavissinneqasasoq.

4. november 2011

UKA 2011/35
(FM 2011/88)

Ataatsimiititaliami amerlanerussuteqartut isumaqarput suleriaqqinnissami pingaaruteqartog toqqaannartumik toqqaannangitsumillu 15 %-init amerlanerusunik piginnissinnaanermut periarfissat inatsisitigut sinaakkusersuinikut periarfissaajunnaariartuaartinneqassasoq.”

Ataatsimiititaliami ikinnerussuteqartut Siumumit sinniisut oqaaseqaatit ataaniittut saqqummiuppaat:

Aalisarnermut Inatsisip allannguutissaanut tunngatillugu Siumumiit ikinnerussuteqarluta oqaaseqaatissavut.

”Siumumit allannguutissatut siunnersuutit marluk ukua akuersaarsinnaangilagut.

§ 6, imm. 3 nr. 4-p §6, imm.4 nr.3-p aamma § 6, imm.5 nr.2-p aamma 3-p

atorunnaarsinniarneqarnerat, aappaatullu § 15, imm.4-p allanngartinniarneqarnera.

Siullermik Siumumiit aalisarnerup ineriartortinneqarnissa nutarterinissarlu assorujussuaq suleqataafigerusupparput suleqataafiguassallugulu.

Kisianni Siumumiit Aalisarnermut Inatsisip allannguutissaatut siunnersuutigineqartut aqqutissaangitsutut isigaarput nutarterinissamut ineriartortitsinissamullu.

Siulleg 50/50 isertitaqarsimanissamik piumasagaat peerniarneqarnera kikkullu

aningaasaatillit suliffeqarfugaluarunik tamarmik periarfissinniarneqarnerat aalisariutinik piginnittunngortinnissaanut aqqutissiuusuunera akuersaarsinnaangilluinnarparput. Siumumiit pingaartilluinnarparput Aalisartut namminersortutut kiffaangissuseqarlutik angallatinik piginnittuunissaat.

Taamaammat allannguutissaq 50/50-imik piumasagaateqarnerup

atorunnaarsinniarneqarnera Siumumit akuersaarsinnaangilluinnarparput.

Malugineqaqqarpullu atuisut tassa aalisartut sinerissap qanittuani tamanna

akerlerilluinnaramassuk. Tamannaluuniimmi tusarniaanermi ilanngunneqarsimanngilaaq taamaalillutik Aalisartut qoqassineqartutut taaneqarsinnaallutik.

Allannguutissap aappaa § 15, imm. 4-p allanngartinniarneqarnera Siumumiit

akuersaarsinnaangilarput. Tamatumani maannakkorpiaq pinerput raajaratassanik

piginnittuuneq, maannakkut pisassiissutit 10%-iinik piginnituusinnaatitaapput taammalu

allanngartinniarneqarpoq 15%-imut qaffallugu, tassagoq raajarniat akilersinnaasumik

ingerlalerinissammata, rajarniarnerup ilungersunartumik ingerlanera

arajutsisimanneqanngilaaq Siumumiit, taamaammat pitsanngorsaannissamik suliniuteqarnissaq

piumassuseqarfigilluinnarparput, aalisariutit ullumikkut atorneqartut

pisogalivallaarsimapput iluarsartuuisarnerup annertualaarnerata akilersinnaanerusumik

aalisarnissaraluaq killilersimaarpa, taamaammat angallatigissaanissaq Siumumiit

suleqataafigalugulu peqataafigissvaraput.

Ullumikkut raajarniat pisassanik piginnittuusinnaaneq qummut killinga 10%-iussoq

namminersortup ataasimaluuniit naamassisimanngilaa, raajarniutit pisassiissutinik 7-10%

tungaanut pigisaqaraluarunik akilersinnaasumik ingerlasinnaanerat Siumumiit

qularutiginningsigut 15%-imut qaffannisaat akerleraaput.

Siumumiit aarleqqutigaarput 15%-imut piginnitussaaneq qaffanneqaralarpat piginnittuusinnaasut ikittuarannornissaat taamaalilluni politikkikkut siunniussaq piginnittuunerup siammarnissaa killormut ingerlasussaavoq, ingerlatseqatigiiffiit pigissaarnerusut pisassa qarnerulissapput pissakinnerusullu kingusinnerusukkat isiginnaartuinnangussapput.

Taamatut allannortitsiniarneq susassa qartorpiaat akerlerilluinnarpaat taakkulu tusaaniarneqanngilluinarput. Illuatungaaniit raajartassamut toqqaanartumik "attuumassuteqanngitsut" kissaattaat kisimi amerlanerussuteqartunit tusaaniarneqarput, naatsumik oqaatigalugu peqarnerit pitsaasumik periarfissinneqassapput, pissakinnerillu nungutinnaasat aqutissiuunneqalerlutik. Tamanna Siumumiit akuersaarsinnaanginnatsigu inatsisip allannguutissaa akuersaarsinnaangilarput.

Siumumit piumasaraarput inatsit pineqartoq allannortinninnerani sinerissap qanittuani aalisarneq pillugu pissutsinik misissueqqissaartoqassasoq. Misissueqqissaarnerup takutissavaa sinerissap qanittuani suut aaqitassaanersut, tamatumalu takutikkumaarppaa aalisarnermut inatsimmi suut allannortittariaqarnersut.

Inatsisip allannguutissai pinngikkallarnerini Inatsisip putoqarneri siullugit iluarseqaarnissat Siumumiit kissaatigaarput, soorlu pisassanik piginnitussaaneq 10%-iugaluartoq ullumikkut tamanna qaangeqalugu piginnittoqalersimammat tamatuma aaqeqqarnissaa sulissutigineq aqqaartariaqartoq ikinnerussuteqartut isumaqarput.

Taamaaliornikkut sinerissap qanittuani aalisartut amerlanerit isumaat naamassineqarsinnaasutut isumaqarfifigatsigut. Siumumiit nalunngilluinnarpaarput kikkut tamat isumaat eqqorlugu aaqiissinnaanata, Inatsisllu allannguutissai attuumassuteqarnerpaat tamarluinnarmik sakkortuumik akerlaeraat. Ikinnerussuteqartutut kissaatigaarput sinerissami qanittumi aalisartut qanimut tikillugit oqaloqatigilluareernerisugut iluarsartuuseqqinnisaaq pisarisartoq, susassa qartut qarsuanagit tusaallugit peqataatillugit tassa Siumumit anguniagarput."

Siunnersuutip aningaasatigut kingunerisassai

Ataatsimiititaliap maluginiarnikuuaa Naalakkersuisut oqaaseqaatini nalinginnaasuni siunnersuummi aningaasatigut kingunerisassat allassimagaat. Taamaalilluni Ataatsimiititaliap tatigaa Naalakkersuisut apeqqut manna sukumiisumik misissorsimagaat, aamma innuttaasunut aamma inuussutissarsiummik ingerlatsisunut sunnerneqartunut aningaasatigut pitsaanngitsumik kinguneqartitsisoqalissasoq. Naatsorsuutinngisamilli pissutsinik pissusissamisuunngitsumik inatsisissatut siunnersuut kinguneqassappat, Ataatsimiititaliap qularutiginnilaa Naalakkersuisut pisariaqanngitsumik utaqqinatik tamanna inatsisip naqqiissuteqarfiginerisigut iluarsiniassagaat.

Ataatsimiititaliap inassutai

4. november 2011

UKA 2011/35
(FM 2011/88)


Ataatsimiititaliami amerlanerussuteqartut Inuit Ataqatigiinnit aamma Demokratinit sinniisut Inatsisartuni aappassaaneerinninnermi inatsisissatut siunnersuut saqqummiunneqartoq akuerineqassasoq inassutigaa.

Ataatsimiititaliami ikinnerussuteqartut Siumumit sinniisut Inatsisartuni aappassaaneerinninnermi inatsisissatut siunnersuut saqqummiunneqartoq itigartinneqassasoq inassutigaa.

Taamatut oqaaseqarluni isumaliutissiissummilu allassimasutut paasinnilluni Ataatsimiititaliap siunnersuut aappassaaniigassanngortippaa.


4. november 2011

EM2011/35
(FM 2011/88)



Aqqaq B. Egede
Siullitaasoq



Niels Thomsen
Siullitaasup tullia


Hans Aronsen


Juliane Henningsen


Karl Lyberth


Finn Karlisen


Hans Enoksen